



**A**Ntonius Fuggerus ex illustri familia Fuggerorum Augustæ Vindelicorum natus, & in omni genere uirtutum educatus est. Is à pueris cum Raymundo fratre operam literis dedit, & uterque in ijs mediocrem sibi cognitionem acquisiuit. Erant etiam multis heroicis uirtutibus conspicui, & Imperatori Carolo gratissimi. Itaque factum ut barones in Vueyflenhorn ab eo creati, & multis honestis officijs decorati fuerint. Hi sua industria paternas opes conseruarunt, & auxerunt plurimum. Eas uerò in optimos quosque usus adhibuerunt, atque in primis literarum studia promouere statuerunt. Itaque nulla ferè per Europam

Academia extitit, in qua non ipsorum alumni diligenter operam literis impenderunt, & in uiros maximos euaserunt. Vnde eorum domus, doctis uiris undique confluentibus, & suas lucubrationes offerentibus, semper frequentata fuit, dum hos suos Mœcenates agnoscerent, et omni posteritati commendatos proponerent.